

506 qu'elle grossissoit à veuë d'œil, & l'ayant bien soufflée
il la fit si || grosse qu'elle deuint la terre comme elle
est à present.

Du reste du morceau de terre il en fit un petit
homme avec de la saliue qu'il cracha dans sa main &
puis le souffla tant qu'il deuint grand, estant grand
il luy donna la parole, en lui soufflant dans la bou-
che. Voilà des sentimens & des pensées qui ne sont
pas trop esloignées de la verité de la chose pour des
Sauuages qui n'ont iamais esté instruits, car il ne se
lit point que iamais les Apostres, leurs Disciples, ny
aucun Religieux auant nous, ayent passé en ces pays-
là pour leur prescher la parole de Dieu, ny autrement.

Pour la creation de la femme, ils disent que le Mes-
sou remit cette petite beste à l'eau qui en rapporta
encore de la terre, de laquelle il fit une femme de la
mesme sorte qu'il auoit fait l'homme, puis demeurans
ensemble sur la terre, ils eurent quantité d'enfans, &
leurs enfans en eurent d'autres; de sçauoir leurs
noms ils n'en sçauent aucuns, leurs peres ny leurs
meres ne leur en ayans pas appris, pour les auoir eux-
mesmes ignorez, comme auoient fait leurs prede-
cesseurs.

507 Et disent de plus que tous ces enfans-là furent pres-
que tous noyez, à cause qu'ils estoient trop meschans.
Il en resta seulement cinq, sçauoir; trois hommes &
deux femmes, lesquels s'estans sauuez dans un canot
se tindrent tousiours sur les eauës, & voicy comme la
chose arriua à leur dire: Ce Messou allant à la chasse,
ses loups ceruiers dont || il se seruoit au lieu de chiens,
estans entrez dans un grand lac ils y furent arrestez.